

Sunday, March 22, 2026

Time - 2:30pm - 2:35pm

**AKASHVANI AIZAWL
REGIONAL NEWS UNIT**

**REGIONAL NEWS BULLETIN
(MIDDAY)**



BRIDGE

Tuisumpui lui a feet 170 a thui lei, Bailey Bridge (TDR) chu nimin khan PWD Chief Engineer (Road) Pu David Sapzova'n a hawng.

He kawng hi Siaha District khawpui Siaha leh Tipi Ferry, PMGSY kawng pawimawh tak Saiha leh Rawmibawk kawnga awm a ni. Riasika, Amotlah leh Thiahra khua te thlunzawmtu leh District dangte nen a in kal pawhna pawimawh tak a ni bawk a ni. Tuisumpui lui a lei awm loh avang hian furpui chhung zawngin tui lian avangin mihring leh lirthei hmangin Tipi Ferry, Riasika, Amotlah leh Thiahra khua te hi tlawh pawh hleih theih lovin an awm thin a. Chuvangin, Tuisumpui lui ah hian Tipi Ferry khawtlang leh a chhehvel khua ten harsa tak chungin kum tin thing lei an dawh thin a. Thing lei hian lirthei prur rit a dawl zawh tawk loh bakah a him tawk lovin a rintlak tak tak lo a ni.

Harsatna hrang hrang te sukhang turin kum 2023 atang khan Tuisumpui lui a lei dawh turin hmalak tan a ni a. Kum 2023-24 tangka kumah Bridge Abutment (Sub-structure) siam nan SASCI atangin cheng nuai 150 hmuh a ni a. He hna thawk tur hian Pu Lalparmawia, Hlimen, Aizawl thlan a ni. Bridge Abutment hna hi kum 2023 October ni 20-ah thawh tan niin, nikum March ni 31 khan zawh fel a ni a. SASCI 2023-24 atang hian Bridge Abutment chauh siam a ni a. PWD hotu te hmalak na in bridge super structure, Bailey Bridge (TDR) siam nan FY 2024-25 ah (Roads & Bridges) hnuaiah Mizoram Sorkar atangin cheng nuai 250 sanction hmuh a ni. He

Bailey Bridge (TDR) siam tur hian Essen Fabricators Pvt. Ltd., Kharagpur, West Bengal thlan a ni a. Nikum October Ni 1 ah hna thawh tan thla hmasa ni 23 khan lei dawh hna hi thawh zawh a ni.

(CZ Hluna, PTC Siaha)



LIKBK

Lairam Isua Krista Baptist Kohhran (LIKBK) rorelna sang ber, Assembly Vawi 27-na chu Nilaini zan atang khan Lawngtlai College Veng Tualchhung Kohhran Biak In-ah neih ania ,zanin hian a tiak ang.

Kum 2026 LIKBK Assembly ah hian department hrang hrang atangin report 169 awm in, thurel tur 15 chhawpchuah a ni. Thupui “Rinawmna” tih chu then hrang hrang hmangin Sermon ngaihthlak a ni. Tukin vantlang inkhawmah General Secretary Rev. Dr. L.H. Lalpekhlua'n Minister Penson thlahna, Minister nemngheh leh Probationary Pastor lakluhna hun a hmang a, Kum 2026-2027 Assembly Budget atan vaibelchhe 39 leh nuai 25 pawm a ni a, Kum 2026-2027 Assembly thupui atan “Krista lo kal lehna” thlan a ni a, Kum 2027 Assembly chu Lawngtlai Chanmari a Moria kohhranin a thleng ang. LIKBK Assembly 2026 a rorel langsung zual zingah LIKBK Minister nemnghehte'n active politics an luh chilh chungchangah inkaihhruaina (Policy) mumal tak siam ni se tih te, Nilai zan thuzir Assembly-in a kalpui mêk chu tuna an ruahman chin kum 2029 bak hi chu tihtawp a, sermon inkhawma thlâk ni se, tih leh "Thlaithar Kût” tih hi Inrinnia hmang lovin Pathiannah “Thlaithar hlan ni” tia hman tawh thin ni se, tih te a tel ani.

Assembly tawp zan, zanin inkhawm chu Assembly Chairman Upa F.Sangdawna'n a kaihruai anga, Chairman kalchhuak Upa LH Mawia'n Pathian thuchah a sawi ang.

(Lalnggheta Ralte, PTC Lawngtlai)



FREE CLINIC

Nimin khan Mission Foundation Movement chuan Ministry of Tribal Affairs atanga tanpuina sum an hmuh hmangin Rulchawm khuaah free clinic an buatsaih.

Inentirna hun tan hmain Upa C. Ropianga'n inentir turte chu tisa leh thlaraua damna an chan ngei theih nan Pathian hnenah a hlan a. He free clinic-ah hian Dr. Rualthankhuma Renthlei, ENT leh Dr. C.K. Lalfakawmi, MBBS te'n natna hrang hrang inentir tura lo kal mi 150-te chu uluk taka lo enin, a thlawnin an mamawh damdawi pek nghal an ni.



ENGINEERING COLLEGE

Lunglei Pukpui a din, Mizoram Engineering College (MEC) chu kum 2026-2027 academic session-a class tan theih beisei a ni.

MEC a class tan thei tur hian hna 80 siam ni tawhin , hna 29 chu sorkarin hnawhkhah a phalsak tawh a. Hna hnawh khah phalsak chin hnawh khat tur hian chak taka hma lak a nih chu Higher & Technical Education department hotuten an sawi ani. All India Council for Technical Education AICTE hnuai a affiliation dilna thehluh ni tawh a. AICTE Regulation, 2019 (Mizoram sorkarin siamtha a a pawm tawh angin leh he College a hostel enkawl dan tur inkaihhraina (MEC Hostel Management and Maintenance Guidelines) chungchangah hriattirna chhuah a ni tawh bawk a ni.

Lunglei Pukpui a MEC hi luah theih a siam a nih theihna turin sorkarin cheng vaibelchhe 25 leh nuai 41 a dah a. Hemi hmang hian Higher & Technical Education department bakah PWD, PHE leh P&E Department ten anmahni chanpual theuh chak takin an buaipui mek a ni.



INDIGENOUS GAME

Doordarshan Indigenous Games & Cultural Festival 2026 chu nimin khan a hmawr bawk a ni.

DD Aizawl leh Mizoram Indigenous Association General Headquarters Aizawl tang kawpin Ramhlun Sports Complex-a an buatsaihah hian Mizo infiamna hrang hrang 9, Insuknawr, Inbuan, Insuknawr, Invawr, Kawikah, In-Arpsual, kalchhet kal leh insaihrupawh te hmang in inelna neih a ni a, Mizo Infiamna te tihmasawn tur leh chawisang turin vawi eng emaw zat Mizo Infiamna kut hi buatsaih ani tawh thin a ni.

Doordarshan Indigenous Games & Cultural Festival 2026-ah hian infiam mi 352 tel in heng zing a 126 chu hmeichhia an ni a, mipa 226 an tel bawk. Aizawl huam chung veng 13 bakah Aizawl pawn khua 12 leh India ram pawn Poland atangin infiam mi 1 a tel bawk ani.

